

Monumentenbureau:

Casnan decora a inspira pa diseña e Seyo di Monumento Proteha



Monumentenbureau a wordo institui riba 1 di januari 1996 y ta e departamento specialisa di Gobierno encarga cu tur aspecto monumental instala pa medio di un Decreto Gubernamental.

A conoce un crecimiento como departamento di gobierno pero tambe den cantidad di proyecto completa, aportando indiscutiblemente na sosten di nos herencia cultural y embeyecemento visibel di nos ciudad y su alrededor.

Di e compleho Eloy Arends pa e Watertoren di San Nicolas pa e edificio di Corte y su Willem de Zwijgerplein pa Cas di Gobernador y Oficina di Gobernacion, y awor den

ehecucion di e Vuurtoren, pero alabes nos Paseo Monumental, esakinan como poco ehempelnan di e trabao extensivo y diverso di nos departamento. Den e ultimo 20 aña Monumentenbureau a guia mas di 30 proyecto cu un balor di inversion di 57 miyon Arubano. E periodo di 2009-2013, tabata e temporada mas productivo den realisacion di proyecto.

E Seyo di Monumento Proteha ta fungi como un simbolo di identificacion pa henter comunidad cu e monumento concerni ta inscribi den e Registro di Monumento y ta keda bao proteccion segun lei. E simbolo a wordo diseña dor di Monumentenbureau mes cu aprobacion di e Min-

ister di Cultura. Ariba nos casnan decora nos antepasadonan tabata pone diferente simbolonan cu diferente significacion. E Simbolo scogita esun cu ta refleha e forma parecido di un flor. Su significativo den nos casnan decora ta "proteccion" indicando proteccion pa e cas.

Despues di segunda guerra mundial internacional a tuma e color blauw pa medio di e blue shield pa identifica monumento. Monumentenmbureaua adapta e color blauw na e color blauw scur cu lo refleha riba nos casnan en combinacion cu nan color original. Aruba no conoce casnan den color blauw scur original. E sitio di pone e simbolo lo ta riba e porta principal di e edificio. E deseo di Monumentenbureau ta cu tur doño di un monumento proteha lo duna su



cooperacion pa pone e Seyo di Monumento Proteha riba nan edificio. Actualmente tin 35 edificionan monumental proteha caba cu tambe a haci conoci den media. Tin mas monumento pa proteha e siguiente añanan.

Directora di Monumentenbureau, ing Yvonne Webb-Kock den su discurso a elabora riba e 20 aña di existencia y alabes a gradici un y tur cu por a contribui na Monumentenbureau. Alabes e directora di Monumentenbureau a splica e nificacion di e seyo y gradiciendo ATA pa financiamiento pa Seyo di Monumento Proteha.

Directora di Monumentenbureau a gradici tur personal di Monumentenbureau pa nan trabao duro diariamente y a pone enfasis gradiciendo e famia di tur e empleadonan di Monumentenbureau pa tur nan apoyo. Directora di

Monumentenbureau a gradici Fundacion Museo Aruba y personal di Museo Historico pa a patrocina e evento di e ceremonia.

Minister di Cultura, Sr. Otmar Oduber, den su discurso a elabora riba e importancia di e monumentonan pa nos herencia, su maneho pa bin pronto cu e directiva pa proteccion y restauracion y a enfatisa cu Monumentenbureau ta desplega un bon trabao y cu hopi profesionalismo.

Gobernador Su Excelencia Sr. Fredis Refunjol y Minister di Cultura, Sr. Otmar Oduber y director di Monumentenbureau, ing. Yvonne Webb-Kock a desvela e Seyo di Monumento. Pa e prome Seyo di Monumento Proteha a scoge pa Fort Zoutman/Willem III toren, mirando cu e ta e compleho monumental mas bieu di Aruba.

Henter aña monumentenbureau ta celebra su di 20 aniversario. Na januari a tene un Misa pa bendiciona e departamento. Pronto tambe pa informa e balor cu nos monumentonan tin pa un y tur pero principalmente pa nos hobennan, Monumentenbureau lo introduci un producto informativo cu di banda di gobierno tambe lo bay wordo treci na e scolnan. Keda pendiente pa mas actividad. □